

REGIONAL NEWS UNIT
ALL INDIA RADIO, AGARTALA
Date: 09-12-2025
Time: 07.35-07.40 AM Hrs
BENGALI MORNING BULLETIN

CM :

মুখ্যমন্ত্রী অধ্যাপক ডাঃ মানিক সাহা আজ দুপুরে সিপাহীজলা জেলার সোনামুড়া মহকুমা শাসক অফিসের নবনির্মিত দ্বিতল ভবনের উদ্বোধন করবেন। গ্রামোন্নয়ন দপ্তরের অর্থানুকূলে মোট ৮ কোটি টাকা ব্যয়ে গড়ে উঠেছে সোনামুড়া মহকুমা শাসক অফিসের নুতন এই ভবনটি। এই অনুষ্ঠান থেকেই ভার্চুয়ালি উদ্বোধন ও ভিত্তিপ্রস্তর স্থাপন হবে আরো ১৭টি প্রকল্পের। অনুষ্ঠানে উপস্থিত থাকবেন উচ্চশিক্ষামন্ত্রী কিশোর বর্মণ ও সংখ্যালঘু উন্নয়ন মন্ত্রী শুল্লাচরণ নোয়াতিয়া, বিধায়ক তফাজ্জল হোসেন, বিন্দু দেবনাথ, সিপাহীজলা জেলার জিলা সভাধিনেত্রী সুপ্রিয়া দাস দত্ত প্রমুখ।

President :

রাষ্ট্রপতি দ্রৌপদী মুর্মু আজ নয়াদিল্লিতে ২০২৩-২৪ সালের জন্য বিশিষ্ট শিল্পীদের সম্মান জানাতে জাতীয় হস্তশিল্প পুরস্কার প্রদান করবেন। কেন্দ্রীয় বস্ত্র মন্ত্রণালয় জানিয়েছে এই মর্যাদাপূর্ণ জাতীয় পুরস্কার ব্যতিক্রমী শৈল্পিক দক্ষতা এবং ভারতের সমৃদ্ধ ও বৈচিত্র্যময় হস্তশিল্প, ঐতিহ্য সংরক্ষণ ও প্রচারের প্রতি সরকারের প্রতিশ্রুতি পুনর্ব্যক্ত করে। বস্ত্রমন্ত্রী গিরিরাজ সিং এবং বস্ত্র প্রতিমন্ত্রী পবিত্রা মার্গারিটাও পুরস্কার বিতরণী অনুষ্ঠানে যোগ দেবেন। উল্লেখ্য সিপাহীজলা জেলার পূর্ব নলছড়ের শিল্পী রঞ্জিত দাসের হাতে আজ রাষ্ট্রপতি পুরস্কার তুলে দেবেন।

CM-State Level Wangala Utsab :

মুখ্যমন্ত্রী অধ্যাপক ডা: মানিক সাহা বলেছেন কৃষ্টি, সংস্কৃতি ও পরম্পরাই আমাদের স্বতন্ত্র পরিচয়। গতকাল উদয়পুরের নাটিনটিলায় আয়োজিত ২০তম রাজ্যভিত্তিক ওয়ানগালা উৎসবের উদ্বোধন করে তিনি একথা বলেন। তিনি বলেন, রাজ্যের ১৯টি জনজাতি গোষ্ঠীর ঐতিহ্য, সংস্কৃতি ও পরম্পরাকে সুরক্ষিত রাখতে রাজ্য সরকার বিশেষ উদ্যোগ নিয়ে কাজ করছে। অনুষ্ঠানে বক্তব্য রাখেন অর্থমন্ত্রী প্রণজিৎ সিংহ রায়, বিধায়ক তথা মেলা কমিটির চেয়ারম্যান অভিষেক দেবরায়।

Vandemataram :

বন্দে মাতরম্ সঙ্গীতের ১৫০তম বার্ষিকী উপলক্ষে লোকসভায় গতকাল আলোচনার সূচনা করেন প্রধানমন্ত্রী নরেন্দ্র মোদী। তিনি বলেন, বন্দে মাতরমের মন্ত্র সমগ্র দেশকে শক্তি ও অনুপ্রেরণা দিয়েছে এবং স্বাধীনতা আন্দোলনকে উজ্জীবিত করেছে। বন্দে মাতরম কেবল রাজনৈতিক স্বাধীনতার মন্ত্র নয়, বরং এটি ভারত মাতাকে উপনিবেশবাদের শৃঙ্খল থেকে মুক্ত করার জন্য একটি পবিত্র যুদ্ধের স্লোগান ছিল। প্রধানমন্ত্রী বলেন, ব্রিটিশ সরকার কর্তৃক বিভিন্ন ধরনের নিপীড়নের বিরুদ্ধে বিদ্রোহে এই সঙ্গীতের মাধ্যমে বঙ্কিমচন্দ্র চট্টোপাধ্যায় অত্যন্ত শক্তি এবং দৃঢ়তার সঙ্গে সাড়া দিয়েছেন।

Byte-PM

IHHL-Khowai :

স্বচ্ছ ভারত মিশন প্রকল্পের আইএইচএইচএল (IHHL) এর মাধ্যমে গতকাল পদ্মবিল ব্লকের ১৮টি এডিসি ভিলেজের চার শতাধিক সুবিধাভোগীর হাতে তুলে দেওয়া হল সরকারি মঞ্জুরী পত্র। বিএসি চেয়ারম্যান প্রশান্ত দেববর্মা জানিয়েছেন, বিশ্ব টয়লেট দিবস উপলক্ষে পদ্মবিল ব্লকের চার শতাধিক পরিবারের হাতে শৌচালয় তৈরির জন্য বারো হাজার টাকার মঞ্জুরী পত্র

তুলে দেওয়া হয়েছে। পরে ধাপে ধাপে আরো সুবিধাভোগীদের হাতে মঞ্জুরী পত্র তুলে দেওয়া হবে।

International Human Rights Day :

ত্রিপুরা মানবাধিকার কমিশনের উদ্যোগে আগামী ১০ ডিসেম্বর প্রজ্ঞাভবনে আন্তর্জাতিক মানবাধিকার দিবস পালন করা হবে। এবছর আন্তর্জাতিক মানবাধিকার দিবসের ভাবনা 'হিউম্যান রাইটস: আওয়ার এভ্রিডে এসেনসিয়েলস'। অনুষ্ঠানের উদ্বোধন করবেন মুখ্যমন্ত্রী অধ্যাপক ডাঃ মানিক সাহা। গতকাল শ্যামলীবাজারস্থিত ত্রিপুরা মানবাধিকার কমিশনের কার্যালয়ে আয়োজিত এক সাংবাদিক সম্মেলনে কমিশনের সচিব ধনবাবু রিয়াং একথা জানান।

Review Meeting-Dhalai :

প্রানীসম্পদ বিকাশ মন্ত্রী সুধাংশু দাসের পৌরোহিত্যে গতকাল ধলাই জেলা শাসকের কার্যালয়ে জেলা ভিত্তিক পর্যালোচনা বৈঠক অনুষ্ঠিত হয়। বৈঠকে চলতি অর্থ বছরে প্রানী সম্পদ, মৎস ও তপশিলি জাতি কল্যাণ দপ্তরের অধীন বিভিন্ন প্রকল্পের সুফল সুবিধাভোগীদের কাছে পৌঁছাচ্ছে কিনা সে বিষয়ে খতিয়ে দেখার পাশাপাশি দপ্তরের গৃহীত বিভিন্ন প্রকল্পগুলি দ্রুত বাস্তবায়নের উপর বিস্তারিত আলোচনা হয়।

Inauguration-Bikash Debbarma :

জনজাতি কল্যাণমন্ত্রী বিকাশ দেব্বর্মা গতকাল আগরতলার নন্দননগরে EDUFEEDUS এডুফিডাস গ্রুপ অফ ইনস্টিটিউশনের GNM নার্সিং কলেজের উদ্বোধন করেন। মন্ত্রী বলেন এই নতুন প্রতিষ্ঠানটি এই অঞ্চলে মানসম্পন্ন নার্সিং শিক্ষা সম্প্রসারণ এবং স্বাস্থ্যসেবা ব্যবস্থাকে শক্তিশালী করার দিকে একটি গুরুত্বপূর্ণ পদক্ষেপ। তিনি আশা প্রকাশ করেন যে

প্রতিষ্ঠানের প্রতিটি শিক্ষার্থী নির্ধা, সহানুভূতি এবং প্রতিশ্রুতির মূল্যবোধকে এগিয়ে নিয়ে যাবে।

Vijay Merchant Trophy :

ত্রিপুরা ও উত্তরপ্রদেশের মধ্যে বিজয় মার্চেন্ট ট্রফি অনূর্ধ্ব ১৬ বছরের ক্রিকেটের তিনদিনের খেলা গতকাল থেকে শুরু হয়েছে। শিমোগার কর্ণাটক রাজ্য ক্রিকেট এসোসিয়েশনের নাভুলা স্টেডিয়ামে টেসে জিতে রাজ্যদল প্রথমে ফিল্ডিং করার সিদ্ধান্ত নেয়। ব্যাট করতে নেমে উত্তরপ্রদেশ প্রথম ইনিংসে প্রথম দিনের শেষে ৯ উইকেট হারিয়ে ২৮৮ রান করে।

Har Ghar Swadeshi Ghar Ghar swadeshi :

হর ঘর স্বদেশি ঘর ঘর স্বদেশি কর্মসূচীকে বাস্তবায়নের লক্ষ্যে গতকাল আগরতলার বটতলা বাজারে বিজেপির ৮ টাউন বড়দোয়ালী মন্ডলের সদস্যরা এক অভিযানে সামিল হন। তারা বাজারে ক্রেতা বিক্রেতাদের সঙ্গে কথা বলে প্রতিটি দোকানে স্বদেশি পণ্যের প্রদর্শন ও বিক্রির জন্য অনুরোধ জানান। এই কর্মসূচীতে উপস্থিত ছিলেন মন্ডল সভাপতি শ্যামল কুমার দেব, সম্পাদক সুরত চক্রবর্তী প্রমুখ।

Khelo Dharmanagar :

ধর্মনগর পুরপরিষদের উদ্যোগে মেগা ক্রীড়া অনুষ্ঠান খেলো ধর্মনগর গতকাল থেকে বিবিআই ময়দানে শুরু হয়েছে। অনুষ্ঠানের উদ্বোধন করেন ধর্মনগর পুরপরিষদের চেয়ারপার্সন মিতালি রাণী দাস। কর্মসূচীতে ৪৪টি বিভিন্ন ইভেন্টে প্রতিযোগিতা করার জন্য প্রায় ৬ হাজার ছেলেমেয়ে তাদের নাম নথিভুক্ত করেছে।

Weather :

আজ আকাশ আংশিক মেঘলা থাকবে। সকালে হালকা কুয়াশা পড়েছে।
আজ দিনের সর্বোচ্চ তাপমাত্রা ২৮ ডিগ্রি সেলসিয়াসের কাছাকাছি থাকতে
পারে। আজ ভোরে সর্বনিম্ন তাপমাত্রা ছিল ১৩ ডিগ্রি সেলসিয়াস।
